

111 年全國語文競賽客家語朗讀文章高中學生組（饒平腔）

編號 1 號

【暗晡頭个海脣】彭瑞珠原作

暗晡頭个海脣，無麼个人，天頂个月光，畏羞个囡在雲背；拘禮个海風，驚生份个吹一陣又恬一陣，出海口个海浪，慢板慢板仔在該激啊激仔<sup>1</sup>。無人出入个魚市場裡肚，就單淨留等，幾蕊<sup>2</sup>孤栖个電火，還過，幾臺摧啊摧仔<sup>3</sup>个抽風機。

魚市場外背闊闊个停車場這片，擎花擎花<sup>4</sup>停等幾臺个自用仔，還毋想睡个駛車人，有人帶等罐頭來供流浪狗、也有人帶等懸旌來湊月光懸魚仔。魚市場該片遠遠个停車場邊脣，幾下个越夜越有元氣个後生人，載等懸有大喇叭个音響，摺車後斗撒向天、三臺車仔比比企，在該咚滋咚滋<sup>5</sup>尋月光共下跳舞。

右手片个音樂聲撓到佢腳底癢癢，毋過，左手片騎等過个兩臺奧多拜，錫著佢个目光。佢跔等佢兜个身影，行上兩百八十公尺長个笨鯊橋，想去睺啊，懸等頭燈个兩個網魚人，係愛網麼个魚仔？月光也勾頭出來了，一浪接一浪个水紋，在月光下睺到清

清楚楚，一張魚網、兩個網魚人，落網、收網，撈起來个係一網个月光。雖然，連魚屎仔都無，毋過，佢兜還係有講有笑，佢想，佢兜怕係為著愛打嘴鼓來个，網魚仔，單淨係兩同年想在月光下共下奈个理由定定。

橋下个溪壩水，也認同佢个想法「係啊，係啊！」緊應緊大聲，佢緊聽緊心色。毋過，摺佢睺真來，該「係啊，係啊！」个聲哨，怕係溪壩水分海浪打轉來，抑係海浪激上溪壩水个聲啊！

毋多知仔，就分佢行過笨鯊橋了。橋這片，日時頭分人箭到轂轂个自行車，這下通棚一列列企好、企正，在月光下恬靜恬靜。光華華个路燈下，無人上下了，就單淨一隻揸等螺殼个毛蟹，對白沙堆勾頭出來又囡倒轉去，對路脣趟過來又趟倒轉去，自家在月光下爽囡人尋。佢企在路脣，睺毛蟹、睺流流流流个溪壩水，在共樣个月光下，異像分佢睺著了，頭擺，該一大陣笨鯊入港時，客家打漁人佢兜面町个笑容。

<sup>1</sup> 激啊激仔：音 gieb a gieb er`；液體來回晃動貌。

<sup>2</sup> 幾蕊：音 gi` lui；幾盞。

<sup>3</sup> 摧啊摧仔：音 kog a kog er`；此為形容機器轉動的聲音和狀態。

<sup>4</sup> 擎花擎花：音 lo` fa` lo` fa`；稀疏間雜著其他花色的樣子。

<sup>5</sup> 咚滋咚滋：音 dung` zii` dung` zii`；形容電子音樂的節奏聲。

111 年全國語文競賽客家語朗讀文章高中學生組（饒平腔）

編號 2 號

【夜鷹】邱一帆原作

毋記得在哪時起勢，佢輒常在斷烏<sup>1</sup>，聽著天頂高「追佢啊追佢，追佢啊追佢」个聲，一聲又一聲，該刺耳吵人个聲音，一直對半夜嘍到天光，正會從佢个耳空肚消失。當多年前，佢第一擺在屋下聽著該恁尖恁利个聲，實在當佇毋著，跔跔行出屋面前去睡。該烏烏像細雞子个身影，在天頂挨啊挨迂迂仔<sup>2</sup>。有成時，毋知係飛到恁了，抑係仰般，會頓腳在屋頂高，灰遑遑个臉身，「追佢啊追佢，追佢啊追佢」个聲，還係一聲嘍過又一聲。

該係麼个鳥呢？聲哨仰會恁吵人？佢遽遽走轉屋肚去，當認真上網路去尋資料，尋上尋下，正發現該種形投个鳥仔，名就安到夜鷹。想起來試著當奇怪！早早在 1861 年就有人在臺南發現佢个影跡，離這下有一百五、六十年了，既經算係臺灣特有亞種个鳥仔，對山肚到平洋、從莊下到都市，滿哪仔都睭得著佢个身影、聽得著佢个唸聲。做麼个佢食了四十大零歲，正第一擺在南庄聽著、注意著恁樣个鳥聲、知著恁樣个鳥名呢？佢試著自家異

敗勢啊！敗勢自家無好好仔認識，一直生活在自家身邊个鳥仔。

逐年新曆二月到八月，係臺灣夜鷹尋伴个繁殖期。七個月恁長个時間，逐隻鳥公就想愛尋著自家理想个對象——鳥嫲，互相培養感情，相好一下來傳代。乜一直愛等到卵孵生，細鳥仔會飛、離開鳥公鳥嫲个保護，正算完成傳宗接代个使命。所以，在這期間，鳥公從入夜到天光，會緊喊出「追佢啊追佢，追佢啊追佢」這吵死人个聲骸，來佔等地盤，嚇走其他可能个對手。也因為夜鷹个聲哨難聽又大聲，有當多愛恬靜驚吵个人，就恁樣分夜鷹吵到睡毋得，闕到望毋得夜鷹遽遽消失忒！

佢知夜鷹个聲哨當吵，吵到人食睡就毋得，尋伴个繁殖期間，確實影響著人个生活。毋過，夜鷹毋係無一坵好<sup>3</sup>，佢對環境也有一定个平衡<sup>4</sup>作用。夜鷹个嘴擘到又闊又利，會用來搶食蟲仔，不管係在暗暗个天頂高、抑係光光个路燈下，水蟻、金龜仔、草蟻還有當多蟲仔，這兜好味緒全係佢个食物。因爭夜鷹个獵食習慣，多多少少也維持了該兜蟲仔个數量，保護等生態个平衡。

<sup>1</sup> 斷烏：音 tonˋ vuˋ；入夜。

<sup>2</sup> 挨啊挨迂迂仔：音 lidˋ a lidˋ dinˋ dinˋ erˋ；轉啊轉。

<sup>3</sup> 無一坵好：音 mo rhidˋ deˋ hoˋ；一無是處。

<sup>4</sup> 平衡：音 pin fen；指一個物體的運動維持不變（亦即沒有加速或減速）的狀態。

111 年全國語文競賽客家語朗讀文章高中學生組（饒平腔）

編號 3 號

### 【芋荷葉个智慧】謝錦綉原作

這幾年長透會在報紙、電視新聞睇著，魚仔肚屎有食著个各種塑膠絡仔。

現下因為塑膠絡便宜又利便，毋管燒个、冷个、冰个，總下用塑膠絡張，無論上山下海，大隻細隻，用過就揸忒，大家早就慣勢恁樣無限制个使用塑膠絡了。

三不二時睇著新聞報導，海鰵死在海唇，研究人員切開肚屎，發現海鰵毋係發病死，係因為食忒多人類擲到海實肚个塑膠絡，無法度消化正死忒。海鰵歸身有塑膠粒个毒性，其他海魚乜共樣；人又捉魚仔來食，這毒性又轉到人類自家。結果就恁樣輪迴，魚仔源頭減少，係因爭大環境污染，人類自家乜係大食物鏈其中之一，健康當然大受影響。

今年正月過忒年，佢從嘉義上來臺北寮一兩個月；佢姊戴新店山頂，有所在好種菜，每擺有菜好摘，佢就坐車仔提來分佢。

第一擺提著佢用紙絡張等个青菜，佢先放冰箱，等到愛煮个時節，打開紙絡睇，哎喔！正知紙絡肚還用三層芋荷葉包等，毋係用塑膠絡包。佢就想：「阿姊呀，你正經跨毋著時代了？這下

還有麼儕用芋荷葉包東西？」佢暗暗在該笑阿姊。

佢先提出一種菜來食，旨食个菜照原旦个芋荷葉包轉去，繼續放冰箱。無想著，過兩日菜食忒，去提第二種菜个時節，打開芋荷葉，發現包在葉肚个青菜，還本本萋萋，到該下，佢正知芋荷葉有恁好用。

這下个時勢，科技恁進步，大部分人總係認為新个發明較好，舊換新，舊東西大家就揸忒。

毋過，毋管新也舊，大家總愛想較長久、想較遠兜，該兜毋會綿、毋會歿个垃圾，越留越多，留到最尾，地球總會分垃圾搵忒；到該量時，人無法度戴地球，後代子孫乜毋知愛戴在哪位正好？

芋荷葉毋單淨做得保存青菜、魚仔、肉，比塑膠絡效果較好，等東西食忒，摻芋荷葉擲忒後，佢還做得轉到泥肚，自然綿忒，變做肥料養分，全無打爽。芋荷葉無毒性，毋會污染環境，顛倒分地球淨利，分人類健康，這係頭擺人个智慧，愛記得正好。

編號 4 號

【老鼠】張捷明原作

老鼠有當多種：田鼠、透地鼠<sup>1</sup>、錢鼠、大老鼠、細老鼠……，田鼠在田坵肚絡食，最愛食番薯，當大隻、又有肉，係頭擺人無豬肉食該下，當重要个肉氣來源之一。

再講透地鼠，佢戴在地泥下，最愛打窿，蒔田个水田，在收冬該下種番薯雜作，係有透地鼠，等到交春蒔田，田脣輒常會漏水，穩水田<sup>2</sup>嘎變漏水田。山田个田坎較高，還會慢慢崩田脣，就係老古人言：「大漏漏毋長，細漏漏燥塘。」意思係講，山魚塘係有老鼠窿，大窿水漏大，會緊張，再仰般無閒，也會抽牽<sup>3</sup>去塞起來，毋過，細窿水漏細，無閒个耕種人就會想，一息息仔定定，就無抽無牽<sup>4</sup>，想講天光日正來補，結果天光日又毋記得，等到想著，魚塘水早就燥忒了。

田鼠會爽<sup>5</sup>番薯，人就捉田鼠食，算係一報還一報打平過。透地鼠當得人惱，毋過，做得分人想著該句老古人言來教子孫，也

<sup>1</sup> 透地鼠：音 pun` ti` chu`；鑽洞鼠。

<sup>2</sup> 穩水田：音 vun` fi` tien；能良好保持水量的水田。

<sup>3</sup> 抽牽：音 chiu` kien`；積極。

<sup>4</sup> 無抽無牽：音 mo chiu` mo kien`；不積極。

<sup>5</sup> 爽：音 song`；破壞、損壞。

算佢還有兜功勞。

另外，還有錢鼠，錢鼠實在就得人惱，戴在人屋下个水溝肚、膠烏疏疏个所在，細細隻無幾兩肉，還一身臭臊拖蟹<sup>6</sup>，係現代阿姆最驚个小動物。毋過，大人也當心色，偏偏膠佢安名錢鼠，怕係講，這家人當有錢，穀倉正會有當多穀分錢鼠食，好得人類知好蓄貓仔打老鼠，係無，金山銀山就會分佢食到空空。

毋過，這下天年<sup>7</sup>倒貶，除忒田鼠、透地鼠、錢鼠，還加一種寵物鼠。寵物鼠無天敵，連貓仔就毋係佢个對手；今个人蓄个貓仔，嘎毋敢打老鼠，更毋敢打寵物鼠，在人个屋下，一片蓄老鼠服侍佢做阿公，一片又試著對貓仔過意毋得，所以也用飼料蓄貓仔做寵物，毋單淨毋使寵物貓打老鼠，還膠老鼠放共下，表示貓鼠世紀大和解，人類第一功。毋過，麼人會知貓仔係仰般想个呢？

二十世紀後，除忒寵物鼠，世界又加一種更新品種个老鼠，毋使飼料，毋會屙屎，淨淨利利又毋會嚙人，日日放到手巴掌惜日惜夜，還做得分人使嘴，佢安到滑鼠。巴掌捉等佢臚身在桌頂一滑，手指點一下佢个耳空，就做得指揮電腦，指揮世界，指揮地球，難怪十二生肖，老鼠早就打第一，貓仔嘎指頭無姓、指尾無名，連膠老鼠比大細个資格就無。

<sup>6</sup> 臭臊拖蟹：音 chiu` so` rhia` he`；一身臭味。

<sup>7</sup> 天年倒貶：音 tien` ngien do` bien`；世界反了。

111 年全國語文競賽客家語朗讀文章高中學生組（饒平腔）

編號 5 號

【阿嬤个烏鷄】曾菁怡原作

戴莊下樹仔多、田多、鳥仔多；天時好，打早就做得睭著電線頂高黏共下像旨睡醒个斑鳩，抑係歸群嘍嘍嘎嘎在路脣絡食个屋簷鳥，有成時還睭得著在天頂飛來飛去个鷄婆，還有一種鳥仔歸身羽毛烏疏疏，淨在翼胛尾膠鳥尾有一息息仔白毛，目珠、背膠該瘦夾夾个腳係黃色个，安到烏鷄，佢總係跳啊跳、跳啊跳，毋多知就帶佢跳入有佢嬤个回憶裡肚。

阿嬤係篤實个莊下婦人家，溫和恬靜，為著家庭一生人就像掙掙轉个極樂仔無時間。天旨光就跣起炆豬菜分豬仔食，天矇光就揸等衫褲去溪壩脣洗衫，衫褲晾好又趕緊去菜園落肥、浴水。除忒這兜，還愛煮三餐、供頭牲、做田事……。當晝該下阿嬤正好歇暍，佢最愛坐在門口个藤椅頂高，目絲絲仔享受清風吹在面頂个鬆爽。

有一日當晝，阿嬤正坐下來準備歇暍，目珠影著外背个竹筴下有一團烏疏疏个東西在該停動，行兼過去睭，發現係一隻還毋會飛个烏鷄鳥子。阿嬤膠佢捉在手町，從頭睭到尾，從尾睭到腳，一下揸啊揸佢个頭那頂膠面頰卵，一下掀開佢幼嫩个翼胛，

搨過來搨過去，像細人仔抓著心色个玩具，睭到目晶晶無眨目。

阿嬤想起閒間肚有一隻頭擺阿叔蓄鸚哥个鳥籠仔，就決定膠這隻鳥子蓄起來。逐晨早，阿嬤手面洗好就去睭籠仔肚个飼料還有無？愛過添水無？一有閒就膠鳥籠仔拚到淨俐淨俐。食飽晝，阿嬤就會膠藤椅徙到鳥籠脣，俛等籠仔教烏鷄講話：「天光哩！」、「食飽旨？」、「大家好！」、「正來奈！」……。日見日，該烏鷄睭著人也會講阿嬤教佢个話了。

無想著，有一日晨早籠門毋知仰般分人打開咧，裡肚个烏鷄也毋知飛去哪位？阿嬤兩隻手捧等飼料，頭磬磬企在籠仔脣，久久正接受烏鷄毋見忒个事實，喃喃喃喃講：「恁打爽，畜恁久欸！」該隻鳥籠仔又收轉去閒間肚囤等。

這拜日阿嬤做對年，阿姆交代愛轉老屋祭拜。燒金該下，幾下隻烏鷄在竹頭下跳啊跳、跳啊跳，成時臥頭東睭西睭，背尾就飛到竹林裡肚，淨伸風吹過竹葉悉悉疏疏个聲，毋知阿嬤這下有膠佢講話个烏鷄無？

111 年全國語文競賽客家語朗讀文章高中學生組（饒平腔）

編號 6 號

### 【網出阿姆个背影】徐熏琪原作

網路就像係一隻洋洋洋洋無邊無脣个大海，網等人摺人之間个距離、網等世界个脈動、網等日常生活。佢，就像係一尾魚仔，輒常洄入網路肚遊遊野野，緊洄緊深、緊洄嘎緊遠……。

還記得讀國中愛開學个前幾日，阿姆提等一支手機仔講愛分佢用。頭下碼，佢懷疑係毋係耳空有聽差，一直愛到撻著手機仔，佢正歡喜到奈毋得，心肚恸想總算有一支手機仔哩！正想愛仰般好好來使用這手機該下，就聽著阿姆講：「分你手機仔，係方便你摺屋下人聯絡事情喲！毋係分你提來變鬼變怪个，也升國中哩，自家愛曉得自重，敢做得到？」佢跔等點頭講：「阿姆放心啦！佢用手机仔一定會有分寸哦。」

續等幾日過後，手機仔底肚三不二時就會跳出遊戲、社交媒體个訊息，「阿姆放心啦！佢用手机仔一定會有分寸。」這句話早就變成一陣風，飛到天背恸遠去哩！

網路世界切斷阿姆摺佢之間个信任，毋多知仔摺屋下人講話个時間越來越短，摺手機仔相處个時間越來越長；搵手做家务个時間越來越少，浸在手机个時間越來越多，佢就像今這下个低頭

族共樣，有日手機仔提上手，愛放下手係無恸該个事情。

記得有一日食飽夜過後，佢堵好摺同學爽等緊張刺激个線上遊戲，阿姆喊佢好去洗碗箸了，佢詐意無聽著，過無幾久阿姆又過喊加一擺，佢就闕猝猝仔應：「大細心！逐擺就喊佢！屋下淨伸佢一儕人吓？」無想著這句話深深刺著阿姆个心，阿姆聽著後，自家恬恬仔行入灶下洗碗。佢睜著阿姆洗碗个背影，感覺著頭下對阿姆堵堵撐撐<sup>1</sup>嶄蠻<sup>2</sup>過分，就遽遽放下手機仔摺阿姆回失禮，摺阿姆手提等个碗箸接來洗。

該暗晡佢為著這件事睡毋落覺，腦肚浮出阿姆洗碗个背影，該背影就像一面鏡仔，照等阿姆腰掛背懸个身影，嘎映出佢無款無調个行為；照等阿姆對佢个開容笑面，嘎映出佢對阿姆目睭睭个面目。更深夜靜，佢个反省比夜還較長，經過這擺个事件，正知著佢个日常生活既經分網路世界縹緲，摺屋下人个關係漸漸疏遠。所以，佢想尋轉阿姆對佢个信任，愛自家要求正確來使用手機仔，學校作業一定愛先完成、搵手做忒家务後正做得使用手機仔，還愛記得摺屋下人多多共下，大家和和接接過日仔該正係最有溫情个家庭生活。

<sup>1</sup> 堵堵撐撐：音 du du cang` cang`；頂嘴。

<sup>2</sup> 嶄蠻：音 zam` man；相當的。

111 年全國語文競賽客家語朗讀文章高中學生組（饒平腔）

編號 7 號

### 【採筍蟲】郭亭好原作

還細時節，爺哀為著愛畜偌兜這陣大細，歸日無閒到換換轉，屋下長透伸著偌兜這幾個細孺仔，逐擺爽到慊了，毋係覆在長凳板睡，斯係在戶檻下睡到四腳惹天，人講个天生天養，就係偌識行過个童年。

等阿哥較大了，佢會帶偌兜滿田滿遍去拈囊蜆、打草蟻，摘硬杌仔、土樣仔來食。該時，屋背有種一大埕个烏葉竹，上筍<sup>1</sup>个竹暴芽斯會有筍蛄<sup>2</sup>來叮筍尾生卵；狡怪个阿哥會帶偌兜去捉筍蛄來爽。阿哥捉筍蛄个本等一等慶，佢講愛細義毋好打醒筍蛄，睭佢細心細意一下斯摻筍蛄捉下來，分佢睭著个筍蛄無一隻走得忒。佢摻捉來个筍蛄用棉線縳核放佢飛，偌兜踅等筍蛄走，該線一下長一下短，像放紙鷂个樣，等偌兜爽慊了正摻線解忒放佢走。

一擺阿哥嘴豺，帶偌兜去尋上筍了，正綻个葉嘎黃忒个嫩竹，阿哥講有筍蛄在該位生卵，裡肚會有筍蟲好拈；睭阿哥大力

摻<sup>3</sup>該葉黃忒个嫩竹，分佢倒拗下來，正經有睭著筍蟲蠕蠕動，偌兜遽遽跔落去搨拈。轉到屋下，阿哥斯將這兜筍蟲放落鑊肚用油煎，偌兜企在灶頭脣胲啲啲<sup>4</sup>等，睭著該香香赤赤个筍蟲，目擘擘、口涎水硬硬都會跌出來了！毋過一儕斯做得分著幾尾筍蟲定定，偌摻老弟三兩口斯囫淨淨了，阿哥睭著遽遽過摻佢碗肚个筍蟲分佢兩儕過願。該量時，阿哥恁肯分食，偌兜嘎無感念阿哥惜偌兜个情意，斯知好顧嘴空，這下想起來對阿哥實在當敗勢。

有一日，隔壁个阿姨來分阿姆請食晝，番綻个阿哥知阿姨毋敢食筍蟲，斯挑挑搥說佢，摻煎好个筍蟲尖入阿姆正煎好个魚肚，阿姨話著係魚卵煞猛食，還緊阿腦講恁好食。尾下老弟無細義嘎講出來，害阿姨撞入便所肚翻到噁噁滾，該日阿哥斯分阿姆扭等耳空去摻阿姨會失禮，還分阿爸罰去祖公牌前跪歸下晝。

這下想起細个時節，雖然無像這下个人生活恁豐湧，毋過日仔過來當自在，當多該下好爽个齣事，一屑都毋會輸這下細人个網路遊戲，偌兜在該田坵山排走相逐个腳跡，還深深印在偌个腦膈肚，係盡心色个回憶。

<sup>1</sup> 上筍：音 shong` gong；竹筍太慢採收而老化成竹子。

<sup>2</sup> 筍蛄：音 sun` gu；昆蟲名，橢圓形，頭小而口吻特長，如象鼻狀，又稱為「象鼻蟲」。

<sup>3</sup> 摻：音 cai；速度快且用力搖晃的動作。

<sup>4</sup> 脣啲啲：音 goi rhio` rhio；光垂涎、無可奈何。

111 年全國語文競賽客家語朗讀文章高中學生組（饒平腔）

編號 8 號

### 【花樹下个童年】李宜諭原作

美濃永安老街在美濃河个北片，歸條永安路對東門樓到德勝伯公壇，分做上莊、中莊、下莊，佢屋下戴「花樹下」，係前莊，這位有南柵門渡船口，係永安老街最鬧熱个地方。

花樹下深深刻等佢个童年。佢姆 49 年嫁來美濃，就在美濃國小教書，還記得，總會睺著佢在操場町教大會舞、在禮堂教民俗舞，還有扇仔舞、篋仔舞、彩帶舞。佢人緣好、手腳溜掠，鄰舍个細妹仔、婦人家都會送佢剪伸个布仔，佢就提來做當靚个衫褲分佢兜著，所以，佢兜恁多姊妹小學个學生帽、制服、洋裝、裙、褲，一概都係阿姆做个。

佢爸嘛係<sup>1</sup>先生，佢當會帶佢兜做童玩，像：雞毛毬仔、銅笏仔<sup>2</sup>車、竹蟬、竹囊蛻仔、竹筒打高腳、紙鷗。該年代，歸伙房大家共下用一隻便所，便所下背係糞缸，睺著恁深个屎窟，佢就會頭那昏昏驚種下去<sup>3</sup>，所以毋敢落去，阿爸就逐晨早載佢兜幾個細犖囉仔去學校上便所，一個人一間，屙忒遽遽轉屋。

還言入學前，佢膠大老妹都係跣等阿哥出去寮，去溪壩脣灌

土狗仔、爽園人尋；去田坵懸蛻仔；去溪壩底覓大肚魚；坐在美濃舊橋頂睺溪壩；在伙房裡背竄上竄下<sup>4</sup>；去阿嬤个溪壩埔菜園爽寮；蹶到鄰舍个圍牆裡背爽扭人仔，鄰舍閱著就會放狗出來操<sup>5</sup>佢兜，佢兜就恁樣練了一身蹶牆个工夫。

寒天過啊忒，美濃河還無麼个水，舊曆二月二伯公生會「做大戲」，係美濃一年一擺做鬧熱个時節，所有嫁到外莊个阿姑、阿姨、姨婆、姑婆都會轉來永安老街在親戚屋下歇幾下日，就係愛「睺大戏」。在南柵門渡船口个溪壩脣，會搭當大个戲棚，戲棚下係佢兜爽寮个好地方，一群細人仔嘛會偷偷走到舞臺後背偷睺佢兜化妝換衫褲。

戲仔上棚了，除忒頭前幾排个老人家坐等睺以外，其他人都係企等睺，有兜人還會企到凳仔頂，細人仔根本睺毋著，阿爸就會摻佢兜擎到肩頭頂，分佢兜睺一下過願，毋過，因為睺毋識也聽毋識，阿爸就會提幾角銀分佢兜去買食，賣打煙腸、仙楂仔、它碼<sup>6</sup>涼水……个攤仔生理一等好。佢阿姑屋下就戴在溪壩脣，姑婆、姨婆摻阿嬤就會坐到阿姑屋後背，愛下溪壩底个碇仔面睺戲，佢想，佢兜應該都係用聽个吧！「睺鬧熱」順續共下「打嘴鼓」。

日見日，年堵年，大人無閒直掣過著遽，細人仔歡喜爽寮定定大。

<sup>1</sup> 嘛係：音 ma<sup>ˇ</sup> he<sup>ˊ</sup>；也是。

<sup>2</sup> 銅笏仔：音 tung gong er<sup>ˊ</sup>；鐵罐的統稱。

<sup>3</sup> 種下去：音 zhung<sup>ˋ</sup> ha<sup>ˊ</sup> kiu<sup>ˋ</sup>；栽下去。

<sup>4</sup> 竄上竄下：音 cong<sup>ˊ</sup> shong<sup>ˋ</sup> cong<sup>ˊ</sup> ha<sup>ˊ</sup>；穿來穿去。

<sup>5</sup> 操：音 cau<sup>ˋ</sup>；追。

<sup>6</sup> 它碼：音 ta ma<sup>ˋ</sup>；彈珠。

111 年全國語文競賽客家語朗讀文章高中學生組（饒平腔）

編號 9 號

### 【舉重仙女】蔡承軒原作

阿美生來拗蠻靚，親像仙女下凡。

厥爸最驚阿美路町堵著惡人，就尋來健身教練訓練阿美。一開始話著阿美會反抗，無想著阿美上了課以後嘎當魂舉重。過後，阿美一下課毋係在健身房、就係去健身房个路上。

阿美進步當遽，擊个重量緊來緊重。雖然試著異食力，毋過佢睺著自家个進步也試著值得了。有時節練到歸身瘦軟疾，也當想推懶；有時節無細義著傷，也想愛放棄。逐擺阿美愛放棄該下，就會想著有人講過：「危險係確定有个，毋過座驚抑毋驚，全睺自家个選擇。」在訓練个過程裡肚，佢了解愛睺著山頂該恁靚个光景，定著無恁該。

一瞞目，過了幾下年。這下舉重對阿美來講就像啟氣恁自然，佢想愛做一個舉重運動員，摺鍛鍊身體个觀念傳揚分較多人知。教練試著分阿美參加比賽个時機到了，阿美無分大家失望，在頭一擺比賽就得獎。佢無半息自滿，因為阿美有較大个目標，該就係參加奧運。

逐日訓練過後，教練都會陪等阿美共下睺優秀選手个影片，

檢查自家還有哪愛改進个。阿美也陸陸續續參加比賽，漸漸仔緊來緊多人認識佢，外背个人摺佢安了一隻偏名，安到：「舉重仙女」。

經過了千辛萬苦，阿美總算得著代表臺灣參加奧運个機會，這係佢幾下年來个夢想，毋過時間及及，佢黏時愛續等訓練，正做得提出最好个表現摺國家爭光。

在恁多湛斗人才个奧運會場，無半儕知阿美係麼人，甚至還有兜仔藐視這個頭一擺來參賽个黃皮膚細妹仔，毋過阿美知佢眼前愛做个就係提出最好个表現，毋使跔人狗呷烏蠅，正經強个人總係用成績來講話。比賽還進行等，就算阿美个分數跔人毋著，佢也還係煞猛牯齧等牙根，毋願放忒，盡遽就來到最尾一關个挺直擊<sup>1</sup>了，教練摺阿美參詳過後，打算盡命牯去拚，去試毋識擊過个重量，係講成功了，阿美就會係這屆奧運个金牌得主。

包尾十分無採，阿美跌鼓<sup>2</sup>了。佢毋會試著見笑，因為佢知就算無成功，也總比無試過較贏。阿美發誓四年過後愛重新轉到奧運个比賽會場，來摺臺灣爭取一坵金牌。

<sup>1</sup> 挺直擊：音 ten` chid kia；挺舉。

<sup>2</sup> 跌鼓：音 died` gu`；指失敗。

111 年全國語文競賽客家語朗讀文章高中學生組（饒平腔）

編號 10 號

【燿窯】劉玉蕉原作

打早，斯聽著阿嬤交代阿姆，去市場割料豬肉、買兜萋魚轉來，「欸，古怪！有麼人做生日係無？」問過阿嬤正知，係滿姑愛轉外家，怪毋得阿嬤恁歡喜！探著滿姑轉來個時間，佢走去莊頭阿惜姨個雜貨店等，佢頭勾勾緊眺望。姑丈個車旨駛俚，佢斯走出去攞手咧，姑丈車一頓恬佢斯蹶上車，滿姑笑等講：「屎脰旨坐燒，斯愛下車咧，恁大閒情！」知佢歡喜，佢尖入車肚斯摻姑表姐妹大聲爽起來。

滿姑帶個等路異錫人，逐儕都有一份外，車後斗還有一大布袋個番薯，阿嬤講：「番薯恁多仰結煞，無斯來燿窯好咧，屋背田肚個泥，上禮拜堵正糲，應該乜燥咧，俚來燿窯，愛無？」「好哦！湛啦！」聽著有好爽，佢這兜黏時斯應口。

起窯哩啲，阿爸拗三砵大泥團做門，窯身斯尋像佢個拳頭嫵恁大個泥砵來結，疊高了還過愛慢慢收俚來，幾下到，結到半爛燻斯扁下來，「唉，老刀嫵無鋼咧，無恁該哦！」臨尾還勞攪姑丈搵手，正順勢搵好。窯一起好，阿哥斯開始派事頭咧，佢喊佢摻姑表姊妹去撿樵，阿姊負責起火、架樵，大姊當倚恃得，火分

佢掌都猛猛猛，紅紅個火舌嫵對泥砵縫鑽出來，像愛擘食人個樣，害佢這兜閃到遠遠遠，無幾久，泥砵斯像紅柿恁樣紅啾啾咧！

「好勢哩啲，樵莫過架，火退出來，斯做得擲番薯落去咧！」阿嬤恁樣講。

火炭培開來，番薯斯一粒一粒擲入窯裡肚去。「哇！」表阿哥個擔竿一拓落去，紅紅個泥砵跔等扁下來，堵好奔在番薯上背，「建設難，破壞容易」，細人仔輪等拓泥砵，逐個都搵著一頭一面，背尾還係姑丈來收尾，佢摻幼泥掖到面頂，用砂耙過頓分佢撈，上背還過插一支香，恁樣一屑煙都無出咧，正喊佢兜去爽。真無簡單結起來個窯，這下脛起來斯像一個番薯壟呢！

園人尋爽還旨罉擺，遠遠斯鼻著香味咧，影著阿姆在該開窯，佢這兜遽遽俚過去脛佢變奇術，阿姆驚怕番薯分佢摻綿，細心細意在該慢慢挖，定定摻，香氣錫到佢這兜口涎水溶溶跌，肚屎乜嘍哩咕嚕緊抗議。田脣項，佢兜比比坐，香香個番薯塞歸嘴，天恁清，番薯恁香，在屋背個田肚，佢兜爽到斷烏正轉屋。